



**Republika e Kosovës
Komuna e Glogocit
Kuvendi i Komunës**



02 Nr. 030/01-5092 dt. 25/01/2023

Bazuar në nenin 11,12 paragrafi 1, dhe 40, paragrafi 2, të Ligjit për Veteqeverisje Lokale, Nr.03/L-040, ("Gazeta Zyrtare e Republikës së Kosovës"), nenit 34. Pika 43.6, të Statutit të Komunes së Drenasit, Kuvendi i Komunës së Drenasit në mbledhjen e mbajtur më **25.01.2023**, miratoi këtë:

V E N D I M

Për Miratimin e Simbolit Përkujtimor të Gjenocidit në Kosovë

Neni 1

Kuvendi i Komunës së Drenasit, të miratojë vendimin që „Lulëkuqja me katër petale“ të behet simbol unik përkujtimor i gjenocidit në Kosovë.

Neni 2

Simboli si në nenin 1, të këtij Vendimi, paraqet katër format e akteve gjenocidale që Republika e Serbisë zbatoi në Republikën e Kosovës, si: vrasjen, dhunën seksuale, spastrimin etnik dhe shkatërrimin e objekteve që lidhen me përkatësinë etnike dhe identitetin shqiptar, ndërsa në vend të kokrrave të zeza të farës së lulëkuqes, në “zemër të lulëkuqes” janë prezantuar figura burrash, grash, djemsh dhe vajzash, për të kujtuar njerëzit e të gjitha moshave dhe të dy gjinive që ishin viktimat të këtij gjenocidi.

Neni 3

Pjesë e këtij Vendimi është simboli i propozuar në bazë të kërkesës nr.01-070/01-1203, dt.06.01.2023, nga Qendra Gjenocidi në Kosovë.

Neni 4

Ky vendim hynë në fuqi 15 ditë nga dita e regjistrimit dhe vlerësimit të ligjshmërisë nga MPL-ja, si dhe 7 ditë nga publikimi në Web faqen zyrtare të Komunës.

Vendimi i dërgohet:
Zyrës së Kryetarit ;
Drejtorisë Përkatëse;
Zyrës së Kuvendit;
Arkivit



Kryesuesi i Kuvendit të Komunës

Milaim Hajdari

ARSYETIM

Kryesia e Qendrës “Gjenocidi në Kosovë - Plagë e hapur, me datë 6.1.2023 i janë drejtuar Komunës së Drenasit me kërkesë si në këtë propozim vendim dhe arsyetim si më poshtë:

Sqarim lidhur me propozimin që lulëkuqja me katër petale të jetë simbol i gjenocidit në Kosovë

Kërkesa publike drejtuar institucioneve shtetërore dhe politike të Kosovës që lulëkuqja me katër petale të bëhet simbol i vetëm përkujtimor i gjenocidit në Kosovë, ka gjetur mbështetje të gjithanshme dhe shfrytëzime rastin të falënderojmë përzemërsisht të gjithë përkrahësit e kësaj iniciative. Megjithatë nga disa dashamirë na është kërkuar të tregojmë arsyet e përzgjedhjes së lulëkuqes, për ta propozuar si simbol të gjenocidit në Kosovë.

Prandaj sqarojmë me sa vijon:

Po bëhet një shekull që në Mbretërinë e Bashkuar, në Kanada, në Skoci, në SHBA dhe në Zelandë të Re, lulëkuqet kanë shërbyer si simbol për t'i përkujtuar të rënët gjatë luftërave anekënd globit dhe secili nga këto shtete demokratike ka përcaktuar një dizajn të veçantë të lulëkuqes, për ta dalluar nga simbolet-lulëkuqe të vendeve të tjera.



KANADA



**MBRETËRIA
E BASHKUAR**



SKOCIA



ZELANDA E RE



SHBA



**PROPOZIMI
PËR KOSOVËN**

Po përmendim se edhe popuj të tjerë kanë përzgjedhur lule të ndryshme për simbol të përkujtimit të viktimave. Kështu për shembull, francezët zgjodhën lulen kokoçel i kaltër, për arsye të ngjyrës së kaltër që kishin uniformat e ushtarëve të vrarë, ndërkaq armenët u përcaktuan për lulen mosmëharro (lulja miosotis) për të përkujtuar viktimat e gjenocidit që kanë përjetuar në vitin 1915.



Lulja kokoçel i kaltër që u bë simbol përkujtimi në Francë.



Lulja mosmëharro (miosotis) që u bë simbol përkujtimi për viktimat e gjenocidit armen.

Pasi analizuam propozime të ndryshme, Qendra “Gjenocidi në Kosovë - Plagë e hapur” mbështeti idenë e Adnan Asllanit që *lulëkuqja* të jetë simbol i viktimave të gjenocidit në Kosovë.

Duke u nisur nga fakti se në përkufizimin e gjenocidit hyjnë aktet kriminale të numëruara në dokumentet e të drejtës penale ndërkombëtare që janë bërë me qëllim që të shkatërrohet tërësisht ose pjesërisht një grup kombëtar, etnik, racor ose fetar, si i tillë, ne jemi përcaktuar për lulëkuqen që ka ngjyrat kuq e zi të flamurit tonë kombëtar, sepse projekti i gjenocidit në Kosovë kishte për qëllim shkatërrimin e shqiptarëve, si grup kombëtar, i ndryshëm nga serbët. Pikërisht për këtë arsye ngjyra e petaleve të lulëkuqes që do të simbolizojë gjenocidin në Kosovë dallon nga nuancat e ngjyrave të kuqe që kanë lulëkuqet-simbole të shteteve të lartpërmendura: është ngjyra e gjakut të pafajshëm!

Përveç nuancës së ngjyrës së kuqe të petaleve që e dallon nga ngjyra e petaleve që kanë *lulëkuqet-simbol* të vendeve të tjera, në simbolin e gjenocidit në Kosovë dallon edhe “zemra e lulëkuqes”: në vend të kokrrave të zeza të farës së lulëkuqes, në logon tonë janë prezantuar figura burrash, grash, djemsh dhe vajzash, për të kujtuar njerëzit e të gjitha moshave dhe të dy gjinive që ishin viktimat e këtij gjenocidi.

Në dallim nga lulëkuqet që përdoren si simbol në vendet e lartpërmendura, katër petalet e lulëkuqes në logon e dizajnuar prej tij paraqesin katër forma të akteve gjenocidare, që Serbia e zbatoi në Kosovë:

1. Vrasje

Për të përfshirë mbi dhjetë mijë civilë shqiptarë të vrarë dhe të gjymtuar, të të gjitha moshave dhe gjinive,

2. Dhuna seksuale

Për të përfshirë mbi njëzet mijë viktime të dhunës seksuale.

3. Spastrimi etnik

Për të përfshirë rreth një milion viktime të spastrimit etnik.

4. Shkatërrimi i objekteve që lidhen me përkatësinë etnike dhe identitetin shqiptar

Për të përfshirë shkatërrimi në vendbanimet shqiptare i 100589 shtëpive, i 358 shkollave, i 30 shtëpive kulturore, i 93 bibliotekave, i 123 institucioneve shëndetësore dhe i 220 objekteve të kultit fetar (215 xhami, teqe, tyrbe dhe 5 kisha katolike).

Petalet e lulëkuqes në këtë logo janë të vendosura në formë të shkronjës X, për arsye se gjatë luftës, në disa vendbanime ku popullsia ishte e përzier në aspektin e përkatësisë etnike, okupatorët serbë kishin shënjuar shtëpitë e shqiptarëve me një X, me qëllim që të udhëzoheshin forcat e armatosura serbe drejt vendeve ku duhej të kryheshin krimet.

Me një fjalë, forma e petaleve dhe figurat e burrave, grave, djemve dhe vajzave simbolizojnë mbi dhjetë mijë civilë shqiptarë të vrarë dhe të gjymtuar, të të gjitha moshave dhe të dy gjinive, mbi njëzet mijë viktime të dhunës seksuale, rreth një milion viktime të spastrimit etnik dhe qindra mijëra shkatërrime që u kryen gjatë zbatimit të gjenocidit në Kosovë.

Si e tillë, kjo logo meriton të jetë simbol i përbashkët i përkujtimit të viktimave të gjenocidit të Serbisë ndaj shqiptarëve të Kosovës.